

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma’n Mizo tawng ziak leh lam dan dik chu tunlai thangtharten an hriat tam a pawimawh a ti a, hemi kawngah hian All India Radio chu theitawp chhuah turin a duh thu a sawi.
- 2. Mizoram Police department chuan kumin thla 6 chhung, January thla atanga June thla inkar khan cheng vaibelchhe 414 leh nuai 66 hu ruihhlo an man.
- 3. India chuan Asia khawthlang lam boruak sosang mek chu a beng dai thuai turin ram hruatute a ngen.
- 4. Thaland khawpui Bangkok-a zu dawr kangah mi 27 an thi.

<><><>

M : AIR STUDIO

Chief Minister Pu Lalduhoma’n Mizo tawng ziak leh lam dan dik chu tunlai thangtharten an hriat tam a pawimawh a ti a, hemi kawngah hian All India Radio chu theitawp chhuah turin a duh thu a sawi.

All India Radio kum 90 tlin lawmna puala AIR Studio-a Chief Minister kawmna ah he thu hi a sawi a, Pu Lalduhoma chuan Mizo tawng ziak dan leh lam dan dik a ngaih pawimawh thu sawiin thangtharten a dik tak an hriat a pawimawh a ti a, Mizo chu hla hril hnam an ni tih sawiin hla hril thenkhatah a thluk awmsa tih danglam awm tam thin chu pawl atih thu sawiin tawng thluk dik ngaih pawimawh a tul thu a sawi a ni.

Chief Minister chuan Mizo hla hrilh hriat tlanglawnah tihsual tam tak awm thin chu thangthar zawk ten a dik tak an hriatloh phah thin a ti a, a phuahtu phuah chhan bo thak khawpa lam chhuah te pawh a awm tih sawiin Mizo tawng dik ngai pawimawh tur leh midangte tana a dik tak phochhuak tam turin All India Radio chu theitawp chhuah turin a duh thu a sawi a ni.

<><><>

ED RAIDS

Enforcement Directorate (ED) Guwahati Zonal office a thawkte chuan tun hnai khan Champhai a dawr 3 tamin kuhva ro hmanga dan kalha sumdawng chenna leh dawr 20 zet an dap.

ED hnathawkte’n an dapte hi Mizoram, Assam West Bengal leh Uttar Pradesh-ah te a ni a. An in leh dawr dap tak neitute hi kuhva ro a sumdawwna sum chheprelh a puhte an ni. Champhai district bika dawr leh in an dapte hi - Hmingthanzami (Beki Kuhva Dawr neitu), Lalrinchhane (L R Store neitu) leh Lalengawli (K.L. Store neitu) te an ni a. Kar kalta Thawhtanni khan an dap a ni. Kuhva ro tawlhruk hmanga sumdawng liante hian Mizoram a an thurualpuite hi an hmang tangkai hle niin ED official-te chuan an sawi a. Kuhva ro hi Myanmar atangin Champhai district a Tiau lui kaltlanga India ram hmun danga phurh luh a ni tih an sawi a. Tuna an chhui bik hi chu Assam, West Bengal leh UP lama phurh luhna kawng leh sum an chhehrelh dan vel a ni a. Tuna an hmuh chhuah chin hi cheng vaibelchhe 1,500 vel a nih thu an sawi a ni.

Champhai district, a bikin Myanmar ramri hnaih lam atanga kuhva ro thawn chhuahte hi Myanmar atanga dan kalha laklulh ngei ni a an rin thu ED official-te chuan an sawi a. A chhan chu Champhai district-ah kuhva an thar lo hrim hrim a ni an ti. He dan kalha sumdawwna lian tham khawihthu ‘syndicate’-te hian GST invoice lem leh sumdawng hming lem bakah bungraw phurh phalna lehkhah lemte an hmang tangkai niin an sawi baw.

Kuhva ro leina sum hi West Bengal leh UP atangin Silchar vela sum chheprelh thiamte kaltlangin Mizoram Rural Bank account hmang tangkaiin Champhai lam kuhva ro tawlhute hriatpui-in pawisa tam tham tak lak chhuahte chu Myanmar lamah pek chhoh leh thin a ni an ti a. An dapna-ah hian an indawr tawn dan leh pawisa inpek dan lehkhah engemawzat man a nih bakah an sumdawwna hlawkna hmanga ram an leina lehkhate, mobile phone, laptop bakah engtia an neih nge sawifiah theih loh sum fai cheng vaibelchhe khat leh nuai 30 an man tel baw a ni.

<><><>

DRUG SEIZURE

Mizoram Police department chuan kumin thla 6 chhung, January thla atanga June thla inkar khan cheng vaibelchhe 414 leh nuai 66 hu ruihhlo an man.

Mizoram Police department thuchhuah-in a tarlan danin, ruihhlo an man te hi heroin kg 34 leh gram 923, cheng vaibelchhe 69 leh gram 84 hu, methamphetamine kg 315 leh gram 903, cheng vaibelchhe 252.72 hu, crystal meth kg 20 leh gram 628, cheng vbc 61 leh nuai 88 hu leh opium kg 141 leh gram 492, cheng vbc 7 leh nuai 7 hu bakah, morphine kg 22 leh gram 286, cheng vaibelchhe 22 leh nuai 28 hu, ganja kg 60 leh gram 68, cheng nuai 30 chuang hu leh thalaiten an hmansual damdawi thenkhat te an ni. Hemi hun chhung vek hian Mizoram Police te chuan NDPS Act, 1985 hnuaiah thubuai 219 an ziaklut a, India khua leh tui mi 255 bakah ramdang mi 57 an man baw a. Ramdang mi tam zawkte hi Myanmar mi niin, ruihhlo kaihnhawiha man te an ni. Police te chuan ramdang mi an man 57 zinga mi 39 te chu heroin kaihnhawiha man niin, midang 16 te chu methamphetamine kaihnhawiha man an ni a, crystal meth leh Ganja kaihnhawihah mi pakhat ve ve an man baw.

Hetihlai hian Mizoram Excise & Narcotics department chuan kumin January ni 1 atanga tun thla July ni 10 thlang khan Heroin kg 15 leh gram 480, methamphetamine kg 63 leh gram 804, crystal meth kg 10.882 bakah ganja kg 133 leh gram 470 leh damdawi dang thahnem tak an man tawh a. Mizoram Liquor Prohibition Act, 2019 hnuaiah dan lova siam rakzu leh sapzu tam tham tak an man tawh baw a ni.

<><><>

LOK ADALAT

Kolasib District Court-a Lok Adalat thutkhawmna-ah thubuai 23 ngaihtuah ni-in, chung zinga 15 chu pawisa inthinna thubuai a ni.

Inrinni khan Kolasib District Court-ah Lok Adalat an thukhawm a, thubuai 23 an ngaihtuah zinga 15 chu pawisa inthinna a ni a. Civil Case dang 7 bakah Revenue thubuai 1 a awm baw k a. Pawisa inthinna thubuai 3 chu chinfel a ni a, hemi atanga an sum hmuh chu cheng nuai 1, sing 4, sang 5 leh 390 a tling a ni.

<><><>

CBCI

India rama Catholic kohhran thuneitu sang, Catholic Bishop's Conference of India, (CBCI) Official Advisor, Pu Jonathan Lalremruata hovin CBCI hruaituten Foreign Contribution (Regulation) Act (FCRA) chungchangah Union Home Minister Amit Shah hnenah Memorandum an thehlut.

CBCI hruaitute chuan Union Home Minister hi Zirtawpni khan Delhi-ah hmu in Foreign Contribution Regulation Act bakah hian sakhaw zalenna chungchang leh Manipur buaina chungchang Memorandum an thehlut a. Pu Amit Shah hi Home Secretary Pu Govind Mohan leh official dangin an tawiawm a, memorandum thehluh chungchang hi an sawi ho nghal a. Union Home Minister chuan FCRA hi Kristian bik bitumna a ni lo tih sawiin, kum kalta khan FCRA hmangin cheng Vaibelchhe 17,000 bawr hmuh a ni a, a pumpui atanga za a 13, cheng Vaibelchhe 3,000 bawr vel chu Kristian organisation tan a ni a ti a. FCRA chu kum 2010-a bill siam tawh niin, ram leh hnam kalh zawng (anti national activities) atana hman a nih loh nan te, a nihna tur ang taka hman a nih theih nan he dan hi siamthat tum a ni a ti a. Kohhran leh a hnuai hmalakna peng hrang hrang bakah sakhaw dang, he Foreign Contribution hmang tangkaitu emaw eng pawl mah bitum bik an awm lo tih sawiin, Kristian pawl hrang hrangte’n kum tam tak India hmasawmna atana hna an thawhna a hriatpui a ti a. CBCI in FCRA Bill hnukkir tura an ngenna chu tun parliament Monsoon session lo awm turah sawi ho tura chhawpehhuah tum a nih thu a lo hrihl baw k a ni.

Union Home Minister chuan Kristiante nekchepna reng rengah FIR thehlut thin tur te, ngaihsak loh, hmalakna awm lo leh duhkhawp lohna a awm a nih chuan Ministry of Home Affairs-ah thlen a, mimal taka a lo bawhzui thin tur thu a sawi a. Kristian pawl hrang hrangte FCRA avanga an sum hmuhna tihtawp sak leh harsatna an tawh zawng zawng la khawm a, ziaka a hnena thehlut tura ngenin, Ministry of Home Affairs in lo enzui a, bawhzui a tiam a ni.

<><><>

BABY BOOM

Mizoram Synod duhdan bawhzui-in Hualngohmun Presbyterian Kohhran chuan fa neih tam dan a zirin nupate lawmman cheng nuai 1 thleng an ruahman.

Aizawl khawpui chhim lam km 12 vela awm Hualngohmun khaw Presbyterian kohhran committee thutlukna ang chuan Mizote piang pung tura fuihna atan nupa-in fa an neih hmasak berah cheng sang khat pek tur a ni a, a pahnihna-ah cheng sang hnih niin fa pathum neite chu cheng sang nga leh fa palina neite chu cheng sing khat pek turin an ruahman a. Fa panga neite chu an fa panga neih hunah cheng sing nga pek tur a ni a. A fa neih tam dana sing khat zela tipung chhovin fa 10 neite chu cheng nuai khat pek tura ruahman a ni. Kohhran chuan nau piang lawmpuina inkhawm hi mihring tam ber hun Pathianni Sunday School inkhawmah Bialtu Upa zelin, urhsun leh ropui takin Lalpa Malsawmnaa fa tam tak Pathian tih mi nei tura malsawmna leh lawmpuina thu chham nen nau piang lawmpuina hi hlan thin a ni.

Hualngohmun kohhran upate’n Akashvani News an hrihl danin tun thleng hian an pek tam ber chu nupa pakhat cheng sing nga an pek chu a nih thu an sawi a. Cheng nuai khat thleng pek tur awm se an duh thu an sawi baw k a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

WEST ASIA

India chuan Asia khawthlang lam boruak sosang mek chu a beng dai thuai turin ram hruatute a ngen. Nimin khan India mite chuanna sumdawng lawnglian GFS Galaxy chu Oman ah beih a ni a. External Affairs Ministry chuan he inbeihna hi a dem thu sawiin lawnga thawktu India mi 11 an awm thu leh mi 10 chu chhanchhuah tawh an ni a ti a. Oman-a Indian Embassy chuan uluk takin chhanchhuah hna thawh hi a vil reng a ni.

(Newsonair)

<><><>

VIETNAM

Vietnam-a Phu Quoc Island-a lawng pilah India mi khualzin 15 an thi. Vietnam thuneitute chuan India mi ruangte hi Ho Chi Minh khawpuiah an la tawh a. Vietnam-a India Embassy chuan India-ah a hma thei ang bera phurh thlak anih tur thu an puang a ni.Nimi n khan mi 36 phur lawng chu Rut NGoal Islet-ah tuifawn nasa thut avangin a pil a. Lawnga chuang mi 21 chu chhanchhuah niin midang 15 an thi a. An vai hian India mi khualzin vek an ni a. Indian Embassy sawidanin mitthi te hi Tamil Nadu atangin mi 10, Andhra Pradesh atangin mi pathum leh Kerala atangin mi pahnih an ni.

(Newsonair)

<><><>

WIMBLEDON

Wimbledon mipa final nizana khelbah World Number 1 leh seeded number 1 Italian tlangval Jannik Sinner chuan seeded number 2 German player Alexander Zverev hnehin a champion. Wimbledon champion lai Sinner hian set khatna a hloh hnuah a zawna set thum lain a champion a. Grand Slam title a panga alakna chiah a ni.

(Newsonair)

<><><>